

ಯಾಕೋಬನು ಬರೆದ ಪತ್ರಿಕೆ ಯಾಕೋಬನೆ ಲೀಖ್ಯೋತೆ ಚಿಟ್ಟಿ ಮಾಲುಮ್ ಕರಾನು

ಯಾಕೋಬಕರಿ ಬೋಲಾನು ಆ ಚಿಟ್ಟಿ ಯಾಕೋಬಕರಿ ಬೋಲೈಲ್ಯಾವಾಳೊ ಖೆವಾಕಿ ಏಕ್‌ಜ್ಜಣಾನ ಲೀಖೈರುಸ್. ಘಣೇಥಿ ಯೋ ಯೇಸುನ ಬೈ ಯಾಕೋಬ ಹುಯಿರೇಣು. ಯೊ ಸಬೇನೊ ಘಲ್ಲೊ ಹುಯಿರೋಥೊ ಅಜ್ಜು ಯೋ ಯೆರೂಸಲೇಮ್‌ನ ಸಬೆಮ ಭಾಗ್‌ಲೀರಾಖವಾಳೊ ಹುಯಿರೋಥೊ. ಅಪೊ 15:13 ಅಪೊಸ್ತಲ ಪಾಲಾಬಿ ಗಲಾತ್ಯವಾಳಾನಿ ಚಿಟ್ಟಿ 2:9 ಮ ಆ ಏಕ್ ಸಬೇನೊ ಖಮ್‌ಕರಿ ಬೊಲೈಲೇಸ್. ಲೀಖಾಪಟ್‌ವಾಳೊ ಯಾಕೋಬನೆ ಲೀಖ್ಯೋತೆ ಆ ಚಿಟ್ಟಿ ಕ್ರಿಸ್ತನಿ ಪೈದಾಖ್ತೆನ ವಾರ್ ಘಣೇಥಿ ಘಣು 50 ವರಖ್ತೆಮ ಲೀಖೈರುಸ್ಕರಿ ವಿಶ್ವಾಸ್‌ಕರಸ್. ಯಾಕೋಬ ಯೆರೂಸಲೇಮ್ಮ ಸಬೇನೊ ಏಕ್ ಘಲ್ಲೊಹುಯಿರೋಥೊ. ಯೋ ಹಿಜ್ಜಾ ಜಿವ್ವುಕರುಕರ ತದೆ ಆ ಚಿಟ್ಟಿನ ಲೀಖಿರಾಖ್ಯೊಣುಷೆ. ಯಾಕೋಬನೆ ಆ ಚಿಟ್ಟಿನ ಅಲಕ್ ಅಲಕ್ ದೇಖ್ತೆಮ ಛಿದ್‌ರೈಗಯುತೆ ಭಾರ ಖೂಮ್‌ವಾಳನ ಖ್ವಣೇದ್ ಕರಿನ್ ಲೀಖಿರಾಖ್ಯೊಸ್. 1:1 ಯಾಕೋಬನಿ ಚಿಟ್ಟೇಮ ಛಾತೆ ಅಖ್ವು ಕವಿಖ್ವಾರು ಅಖ್ವು ಕ್ರೈಸ್ತನಿ ಬಾರೇಮಸ್ ಕತೋಬಿ 12 ಖೂಮ್‌ಕರಿ ಬೋಲಾನು ಉಪಯೋಗ್ ಯಾಕೋಬನೆ ಯೆಹೂದಿ ವಿಶ್ವಾಸಿಯೋನ ಲೀಖಿರಾಖ್ಯೊಸ್ ಕರಿ ವತಾಳಿದೇಸ್. ಶನಕತೊ ಆ ಪುಸ್ತಕ ಘಣೇಥಿ ಘಣು ಪಥಾವಾಳಾನ ಛಿಮಾವಾನಿಮತ್ ಹುಯಿರುಸ್. ಅನಾಮ ಕೈಏಕ್ ವಿಚಾರ್ ಛಾ. ಯಾಕೋಬನೆ ವಿಶ್ವಾಸ್ ಅಜ್ಜು ಕಾಮ್ಪಿ ಬೀಚ್ಚಿ ಸಂಬಂದನಿ ಬಾರೇಮ ಘಣಿ ನಜರ್ ಕರಸ್. ಖ್ವಾಚಿ ವಿಶ್ವಾಸ್ ಕಾಮ್‌ಥಿ ವತಾಳೈಲೇಸ್. 2:17 ಯೋ ಶೌಕಾರಿ ಅದ್ವಿಖ್ವಾರು ಅಲ್ಪಿ ಗುಣ್ಣಾ ವತಾಳಿಲ್ಯಾವಾನಿ ಪರಕ್ತ ಹೊಷಾರಿ ಕರಸ್. 2:1-4 ಅಜ್ಜು ಅಪ್ಪೆ ವಾತೆಬೋಲಿಲಿಯೆಸ್ತೆ ಇನ ಹೊಷಾರಿಥಿ ರಕ್ಷೆಣು ಕರಿ ಅಪ್ಪುನ ಬೋಲಿ

ವತಾಳಸ್. 3:1-12

ಕಾಡಿದೇಖೊ

1. ಯಾಕೋಬು ಪಥವಾಳಾನ ಖ್ವಲಾಮ್‌ಕರಸ್. 1:1
2. ಇನಕೇಡೆಥು ಯೋ ತಕಲೇಬ್ ಆಯೂತೆ ಖ್ವಮಾಳಿಲ್ಯವಾನ ಕ್ರಿಸ್ತನ ವಿಶ್ವಾಸಿಯೋನ ಹುಮ್ಮಖ್ವ್‌ಕರಸ್. 1:2-27
3. ಇನ ಬಾದ್‌ಮ ಕಾಮ್‌ಥಿ ವಿಶ್ವಾಸ್ ವತಾಳನು ಕೆತ್ತು ಜರೂರತ್‌ಕರಿ ಬೋಲಸ್. 2:1-26
4. ಇನಕೇಡೆಥು ವಾತೆಖ್ವಾರಿ ಕೆತ್ರಿ ತಾಖತ್ನಿ ಹುಯಿರೀಸ್ ಕರಿ ವತಾಳಸ್. 3:1-12
5. ತದೆ ಯಾಕೋಬು ಜಗತ್‌ನು ಅಕ್ಕಲ್ ದೇವ್ನಿ ಗ್ಯಾನ್‌ಥಿ ಕೆತ್ರಿ ಪರಕ್‌ಪಡಸ್ ಕರಿ ಛೋಡಿ ವತಾಳಸ್. 3:13—4:10
6. ಇನಕೇಡೆಥು ಇನೆ ಬಡಯ್ ಮಾರಿಲ್ಯಾವಳಾನಿ ವಿರೋದ್ ಪಥವಾಳಾನ ಹೊಪಾರಿ ರ್ವವಾನ ಬೋಲಸ್. 4:1—5:6
7. ಯಾಕೋಬುನೆ 5:7-20 ವಚನ್‌ಮ ಥೋಡು ಮಾಮೂಲಿ ಸಮಾಚಾರ್ ಬೋಲೊಹುಯಿನ್ ಚಿಟ್ಟಿನ ಖ್ವತಮ್‌ಕರಸ್.

¹ ದೇವ್‌ನಾಬಿ ಪ್ರಭುಹುಯಿರೋತೆ ಯೇಸು ಕ್ರಿಸ್ತನಾಬಿ ದಾಸ ಹುಯಿರೋತೆ ಯಾಕೋಬು ಅಲಕ್ ದೇಖ್ವ್‌ಮ ಛಿಡ್‌ಕ್ಯೆರ್ವ್ತೆ ಭಾರ ಖೂಮ್‌ವಾಳನ ಲಿಖಾನು ಶಾತ್‌ಕತೊ, ತುಮೂನ ಅಟ್ಟು ಹುವಾದೆ.

ವಿಶ್ವಾಸ್ ಅಜ್ಜು ಗ್ಯಾನ್

² ಮಾರ ಬೈಯೇ ಭೇನೆವೊ, ತುಮೆ ಥರಥರಾನು ವದೇಖ್ವ್ ರ್ವೇಲಾನಿ ವಖ್ವ್ತೆ ಇನ ತುಮೆ ಹೈರುತೆ ಖಲಿ ಖ್ವಶಿಕರಿ ಬೋಲಿನ್ ಖ್ವಮಾಳಿಲೇವೊ.

³ ಶನಖ್ವಾಜಿಕತೊ ಯೊ ಖ್ವತಾಪ್ಪಿ ತುಮಾರಿ ವಿಶ್ವಾಸ್‌ನ ತರೀಪ್‌ಶ ಕರಾನಖ್ವಾಜಿ ಐರ್ವ್ವಸ್. ಯೊ ತುಮುನ ಸಮಾಧಾನ್ ಮಳಾನಿತರ ಕರ್ಶೆ.

⁴ ಯೋ ಖ್ವಮಾಳಾನು ತುಮಾರಮ ಭರ್‌ಪೂರ್ ಹುವಾದೆ. ತದೆತುಮೆ ಮೈಲಾ ಕಾಹೆತೇಬಿ, ಖ್ವಾರಿ ಅಟ್ಟಿಗುಣ್‌ಮ ಪೂರಾಬಿ, ಅಜ್ಜು ಶನಾಮಬಿ ಕಮ್ ನಾರ್ವಾಳು ಹುಯಿರ್ವ್ತೆಶು.

5 ಕತೋಬಿ ತುಮಾರಮ ಕಿನಾತೋಬಿ ಗ್ಯಾನ್‌ಕಮ್ ರ್ವಯೂತೋ ಯೋ ದೇವ್ವ ಗಿಂಗೈಲ್ಯವಾದೆ, ದೇವ್ ಚಿಂಫಾವ್‌ಶೆಕೊಂತೆ ಖ್ವಾರಸ್ಸ ದಿಲ್ ಫೋಡಿಸ್ ದಿಶೆ.

6 ಕತೋಬಿ ದೇವ್‌ಕನ ಬೋಲಿಲ್ಯಾವಾಳೊ ಭರಾಬಿ ಗುಮಾನಿ ನಾ ಕರ್ನುತೆ ವಿಶ್ವಾಸ್‌ಥಿ ಬೋಲಿಲ್ಯವಾದೆ. ಶನಕತೊ ಶಕ್ ಕರಾವಾಳು ವಹಿರಾಮ ಮಾರ್‌ಖೈಜಾಯಿತೆ ದರ್ಯಾವ್‌ನ ರೋಕಾಳ್ಯಾನಿತರ ವನ್‌ವನ್‌ತೊಫಂಡ್‌ಶೆ.

7 ಎಥ್ರಾನವಾಳೊ ಯೋ ಪ್ರಭುಧಿ ಗಿಂಗೈಲಿದೋತೆ ಖ್ವಾರಸ್ ಲೀಲಿಶ್ಚರಿ ನಕೊಲಾರ್ಪಾದೆ.

8 ಶನಕತೊ ಯೋ ಬೇ ದಿಲ್‌ವಾಳೊ, ಇನ ಚಾಲ್‌ಮ ಚಲ್‌ಪ್ಲಾಟಿನೊ ಹುಯಿರೊಸ್.

ಗರೀಬ್ ಅಜ್ಜು ದಾಲತಿ

9 ಕ್ರಿಸ್ತಮ ಖರಾಬ್ ಹಾಲತ್ಮರ್ದವಾಳೊ ಬೈಯೇ,ಭೇನೆವೊ ಯೋ ಅಲ್ಫಿಹಾಲತ್‌ಮ ಆಯೋಕರಿ ಖುಷಿಕರಾದೆ.

10 ಕ್ರಿಸ್ತಮ ಶೌಕಾರ್ ಹುಯಿರೋತೆ ಬೈಯೇ,ಭೇನೆವೊ ಯೋ ಗರೀಬ್‌ಹಾಲತ್‌ಮ ಆಯೋಕರಿ ಖುಷಿಕರಾದೆ. ಕತೋಬಿ ಶೌಕಾರ್ ಫಾಖ್ವೊನಿ ಪೂಲ್‌ನಿತರ ಮಟಿಜಾಶೆ.

11 ಶನಕತೊ ಚಾಂದ್ ನಿಕ್‌ಳ್ಕುತೆ ತದೆ ಇನ ಅಂಚ್‌ಥಿ ಫಾಖ್ವೊ ಕರ್ಮರೈನ್ ಯೋ ಫಾಖ್ವೊನು ಪೂಲ್ ಲಡ್ಕಿಪಡೀನ್, ಇನು ಶನ್‌ಗಾರ್ ನಾಶ್ ಹುಯಿಜಾಸ್. ಇಮ್ಮಸ್ ಶೌಕಾರ್ ಇನಿ ಕೋಶಿಶ್‌ಥಿ ಹೇಟ್ ಪಡಿಜಾಸ್.

ತರೀಪ್ಪ ಅಜ್ಜು ವದೇಖ್ವೊ

12 ಕೋಣ್ ತರೀಪ್ಪನ ಖ್ವಮಾಳಿಲೇಸ್ಕಿ ಯೋ ಧನ್ಯ. ಯೋ ಇನಿ ಶೋದನೆನ ಜುತಿಲಿದೊತೊ ಪ್ರಭು ಇನ ಪ್ಯಾರ್‌ಕರಾವಾಳನ ವಾಗ್ದಾನ್ ಕರೊತ್ಕೆ, ಜಾನ್ನು ಕಿರೀಟ್‌ನ ಲೀಲಿಶೆ.

13 ಕೋಣ್‌ತೋಬಿ ಶೋದನೆಮ ಪಡಾನಿ ಖ್ವಯಾಲ್‌ಹುಯುತೊ ಆ ಖ್ವಯಾಲ್ ಮನ ದೇವ್‌ಥಿ ಆಯುಕರಿ ನಾ ಬೋಲ್‌ನು. ಶನಕತೊ

ದೇವ್ ಖರಾಬ್‌ಕರಾನ ಹುಮ್ಮಖ್ತ್ ಕೊದೇಯ್ತು. ಯೋ ಕಿನಾಬಿ ಶೋದನೆ ಕರಾಬಿಕೊಯ್ತು.

14 ಕತೋಬಿ ಹರೇಕ್‌ಭಣುಬಿ ಇನಿ ಶೊಂತ್ ನಿಕ್‌ಳ್ಜಾನ್‌ಮ ಪಡೀನ್ ಶೋದನೆ ಲೀಲೆಸ್.

15 ಇನಪಾರ್ ನಿಕ್‌ಳ್ಜಾನ್ ಬೇಜೂನುಹುಯಿನ್ ಪಾಪ್ಪ ಭಣಸ್. ಪಾಪ್ ಪೂರಹುಯಿನ್ ಭಡೀನ್ ಇನಪಾರ್ ಮರಣ್‌ಲ್ಯವಾಸ್.

16 ಮಾರ ಪ್ಯಾರ್‌ನ ಭೈಯೇ ಬೇನೆವೋ, ಆ ವಿಚಾರ್‌ ಬಾರೇಮ ಧೋಕ ನಕೊ ಖಾವೊ.

17 ಖ್ವಾರೂಸ್ ಅಲ್ಪು ತೋಫಬಿ, ಪೂರಹುಯುತೆ ಖ್ವಾರೂಸ್ ವರಾಬಿ ಉಪ್ಪರ್‌ಧು ಆಯು ಹುಯುಸ್, ಯೋಖ್ವಾರು ಪರಲೋಕನೊ ಉಜಾಳನೊ ಬಾಥೀಸ್ ಉತ್ರಿಆವಸ್. ದೇವ್ ಲ್ಹಾಳನಿತರ ಬದ್ವಿಜಾವಾಳೊಬಿ ಕಾಹೆ, ಚಲ್‌ಪ್ಲಾಟಿನೊ ಖ್ವಾಯಲ್‌ನೋಬಿ ಕಾಹೆ.

18 ದೇವ್ ಇನಿ ಅಲ್ಪಿ ಖ್ವಿಜ್‌ನಿ ಪರಕ್ತ ಖ್ವಾಚಿವಚನ್‌ಥಿ ಅಪ್ಪುನ ಜಾನ್‌ದೀರಾಖ್ಯೊತೆ ಇನಖ್ವಾಜೆ ಅಪ್ಪೆ ಇನಿ ಖ್ವಾರಿಸ್ ಉಬ್‌ಜಾಲ್ವಿಮ ಫಹಿಲಫಲ್ ಹುಯಿರ್ದಾಸ್.

ವಚನ್ನಿತರ ಖ್ವಮ್‌ಜಾನ್ ಅಜು ಕರಾನು

19 ಮಾರ ಪ್ಯಾರ್‌ನ ಭೈಯೇ ಭೇನೆವೊ ತುಮೆ ಅನ ಅಲ್ಪಿನಿತರ ಮಾಲುಮ್ ಕರೈವೊ, ಹರೇಕ್‌ಭಣುಬಿ ಖ್ವಮ್‌ಜಾಮ ಚಾತುರ್‌ರೈನ್, ವಾತ್‌ಬೋಲಾಮ ಅಜು ಇರಾದೊ ಕರಾಮ ಖ್ವಮಾಳಿರೈವೊ.

20 ಶನಕತೊ ಅದ್ವಿನೊ ಇರಾದೊ ದೇವ್ ಆಖ್ವಾಕರಸ್ತೆ ನೀತಿನ್ ಕಾಮ್‌ಖ್ವಾರು ಕರಾನ ಹೋಯಿಕೊಯ್ತು.

21 ಇನಾಖ್ವಾಜೆ ಖ್ವಾರೂಸ್ ಗಲೀಜ್‌ಕಾಮ್‌ನಾಬಿ ಅಖ್ಪು ಖರಾಬ್ ಫನ್ನೆನಾಬಿ ಕಾಡಿನಾಖಿನ್ ತುಮಾರಮ ಜಡ್‌ಗಾರಿರಾಖ್ಯೊತೆ ವಚನ್ನ ಮುಡ್‌ಹ್ಯ ಝುಕ್ಯೆನ್ ಸ್ವಿಕಾರ್‌ಕರೊ. ಯೋ ತುಮಾರ ಆತ್ಮನ ರಕ್ಷಣೆಕರಾನ ಶಕತ್‌ವಾಳು ಹುಯಿರ್ದೆಶೆ.

22 ತುಮೆ ವಚನ್ನಿ ಪರಕ್ ಚಾಲಿಲ್ಯಾವಾಳ ಹುಯಿರ್ದಿವೊ. ಇನ ಖಲಿ ಖ್ವಮ್‌ಜಾವಾಳ ಹುಯಿರ್ದಿನ್ ತುಮಾರು ತುಮೇಸ್ ಧೋಕ ಕರಿಲೇವೊನಕೊ.

23 ಶನಕತೊ ಕೋಣ್‌ತೋಬಿ ವಚನ್ ಖ್ವಮ್‌ಜಾವಾಳು ಹುಯಿರ್ದಿನ್ ಇನಿಪರಕ್ ಚಾಲ್ಯುನಾತೊ ಯೋ ಐನಾಮ ಇನು ಪೈದಾಖ್ವನು ಮ್ಹೋಡು ದೇಖಾವಾಳ ಅದ್ವಿನಿತರ ಹುಯಿರ್ದಿಶೆ.

24 ಶನಕತೊ ಆ, ಇನ ದೇಖಿಲಿನ್ ಜೈನ್ ಮೇ ಅಮ್ ಲ್ಹೂಕರಿ ಬೋಲಾನು ಯೋಸ್ ಘಡೀಮ ಬೈಕಿಜಾಸ್.

25 ಕತೋಬಿ ಛುಟ್ಕಾರ್ ದ್ಯಾವಾಳು ಅಖ್ವುಪೂರ ಹುಯಿರ್ದಿತ್ತೆ, ಧರ್ಮಶಾಸ್ತ್ರನ ದಿಮಾಕ್‌ಲಗಾಡಿ ಫಡೀನ್ ಬಿಜೂಬಿ ಖ್ವಯಾಲ್ ಕರಿನ್ ಇನಿನಿತರ ಚಾಲವಾಳೊ ವಚನ್ನ ಖ್ವಮ್‌ಜಿನ್ ಬೈಕಿ ನಾ ಜಾವ್ಣುತೆ ಯೋ ಪರಕ್ ಇನ ಕಾಮ್‌ಥಿ ಧನ್ಯಹುಯಿರ್ದಿಶೆ.

26 ತುಮಾರಮ ಮೆ ಅಛ್ವೊಭಕ್ತಕರಿ ಬೋಲಿಲ್ಯಾವಾಳೊ ಕೋಣ್‌ತೋಬಿ ಇನಿ ಜೀಬ್‌ನ ಲಗಾಮ್ ನಾ ಘಾಲಿನ್ ಇನ ದಿಲ್ವ ಧೋಕ ಕರವಾಳೊರ್ದಿಯೋತೊ ಇನಿ ಭಕ್ತಿ ಬಿಣ್‌ಫಾಯಿದಾನು ಹುಯಿರ್‌ಹೊಸ್.

27 ವದೇಖ್ವಮ ಪಡ್ಯರ್ದಿನ್ ದಿಕ್‌ಕೊಂತೆ ಇವ್ಣುನಾಬಿ ಮುಂಡಚ್ಚಿಯೇನಾಬಿ ಬಚಾಡಿನ್ ಇನ ಜಗತ್‌ನು ದೋಷ್ ನಾಲಗ್ತುತೆ ಇನುಯೋಸ್ ಬಚಾಡಿಲ್ಯಾವನುಸ್ ಬಾ ಹುಯಿರೋತೆ ದೇವ್‌ಕನ ಶುದ್ಧಬಿ ಪಾಕ್‌ಬಿ ಹುಯಿರ್ದಿವಾನಿ ಭಕ್ತಿ.

2

ಪಕ್ಷಪಾತನಿ ವಿರೋಧ್ ಝೇತಾವ್ಣಿ

1 ಮಾರ ಭೇನೆ ಬೈಯೇವೊ ಮಹಿಮೆಮ ರ್ದವಾಳೊ ಅಪ್ಪೊ ಪ್ರಭು ಹುಯಿರೋತೆ ಯೇಸುಕ್ರಿಸ್ತಮ ವಿಶ್ವಾಸಿ ಹುಯಿರಾತೆ ತುಮಾರಮ ಬೇದ್‌ಭಾವ್ ನಾರ್ದಿವ್ಣು.

2 ಏಕ್ ವೇಳ್ ಶೌಕಾರ್ ಅದ್ಮಿ ಖೊನ್ನಾನಿ ಅಂಗುರಿನಾಬಿ ಶನ್‌ಗಾರ್ ಲುಂಗ್ಡು ಫೇರಿಲಿನ್ ತುಮಾರಿ ಸಬೆಮ ಆಯುತೊ ಅಜ್ಜು ಏಕ್‌ಗರೀಬ್ ಅದ್ಮಿ ಫಾಟು ಲುಂಗ್ಡು ಪೇರ್ಟ್‌ಲಿನ್ ಆಯುತೆ,

3 ತುಮೆ ಅಲ್ಟ ಲುಂಗ್ಡು ಪೇರ್ಟ್‌ರಾಖವಾಳನ ಮರ್ಯಾದಿ ಕರೀನ್ ಇನ “ತೂ ಹಿಜ್ಜಾನಿ ಆ ಅಲ್ಟಿ ಝಗೋಪರ್ ಬೇಖ್” ಕರೀಬಿ, ಯೋ ಗರೀಬ್‌ನ, “ತು ಹಿಜ್ಜ ಭೀರೆ ನತರ್ ಹಜ್ಜ ಮಾರ ಗೋಡ ಮ್ಹೇಲಾನ ರಚ್ಚಾಕನ ಬೇಖ್” ಕರೀಬಿ ಬೋಲ್ಕುತೊ,

4 ತುಮೆ ತುಮಾರಮಸ್ ಗುಮಾನಿ ಕರೋಸ್ ಆ ನಾಹುಯಿನ್ ತುಮೆ ಕರಸ್ತೆ ನ್ಯಾವ್‌ನಿ ತೀರ್ಪ್ ಗಲತ್ ಖ್ವಯಾಲ್ನು ಹುಯಿರ್ದ್.

5 ಮಾರ ಪ್ಯಾರ್‌ನ ಬೈಯೇ ಭೇನೆವೊ ಖ್ವಮ್‌ಜೊ ದೇವ್ ಆ ಜಗತ್‌ನು ಗರೀಬ್‌ನ ವಿಶ್ವಾಸ್‌ಮ ಶೌಕಾರ್ ಬಣೈನ್‌ಬಿ ಇನ ಪ್ಯಾರ್ ಕರಾವಾಳನ ದೇವ್ ವಾಗ್ದಾನ್ ಕರೈತೆ ರಾಜ್ಯನ ಭಾದ್ಯ ಬಣೈನ್‌ಬಿ ರ್ವೇವ್ಚಕರಿ ಚೂಣಿಲಿದೊ ಕೊಯ್ತಿಕಿಶು?

6 ಕತೋಬಿ ತುಮೆತೋ ಗರೀಬ್‌ನ ಖ್ವರಮ್ ಕಾಡಿನಾಖಿದಿದ. ತುಮುನ ಖ್ವತ್ತೆನ್ ನ್ಯಾವ್‌ನಿ ಝಗೋನ ಖ್ವಾಮ್ಣೆ ಖೇಚಿಲೀಜಾವಾಳ ಶೌಕಾರ್ ಕಾಹೆಕಿಶು?

7 ತುಮೆ ಬೋಲಸ್ತೆ, ಯೋ ಮಹಾನ್ ನಾಮ್ನ ದೂಷಣೆ ಕರಾವಾಳು ಇವ್ಣೆಸ್ ಕಾಹೆಕಿಶು?

8 ಕತೋಬಿ ಧರ್ಮಶಾಸ್ತ್ರಮ ಲ್ಹಾತೆ, “ತಾರ ಭೀಡೆವಾಳನ ತಾನಿಂತರಸ್ ಪ್ಯಾರ್ ಕರನ್!” ಕರಿ ಬೋಲಾನು ರಾಜನಿ ಹುಕುಮ್‌ನ ಚಲಾವವಾಳ ಹುಯಿರ್ದ್‌ತೊ ತುಮೆ ಅಲ್ಟು ಕರಾವಾಳ ಹುಯಿರ್ದ್‌ಶು.

9 ತುಮೆ ಅಶಿಲ್‌ಕಮ್‌ಶಿಲ್‌ಕರಿ ಬೋಲವಾಳ ಹುಯಿರ್ದ್‌ತೊ ಪಾಪ್ ಕರಾವಾಳ ಹುಯಿರ್ದ್‌ನ್ ಅಪರಾದಿಕರಿ ಧರ್ಮಶಾಸ್ತ್ರನಿ ಪರಕ್ಮ ಫೇಡ್ ಲೀಲಿಶು.

10 ಶನಕತೊ ಕೋಣ್‌ತೋಬಿ ಧರ್ಮಶಾಸ್ತ್ರನಸ್ ಪಾಡಿಚಾಲಿನ್ ಏಕ್‌ನು ಎಕ್ಕ್‌ಸ್ ವಾತ್ತ್ ಗಲತ್ ಹುಯಿಗಯುತೊ ಅಧ್ರಾನವಾಳು ಅಖ್ವೀಸ್ ಬಾರೆಮಾಬಿ ಅಪರಾದಿ ಹುಯಿರ್ದ್‌ಸ್.

11 ಶನಕತೊ ವ್ಯಬಿಚಾರ್ ನಕೊಕರ್ ಕರಿ ಬೋಲ್ಯೊ ಹುಯೊ ದೇವಸ್ ಅದ್ತಿನ ಖೂನಿ ನಕೊಹು ಕರೀಬಿ ಬೋಲ್ಯೊ. ಇನಖ್ವಾಜೆ ತೂ ವ್ಯಬಿಚಾರ್ ನಾ ಕರೊತೋಬಿ ಖೂನ್ ಕರಿನಾಖ್ಯೊತೊ ಧರ್ಮಶಾಸ್ತ್ರನ ಮೀರಿನ್ ಚಾಲವಾಳೊ ಹುಯೊ.

12 ಛುಟ್ಕಾರ್ ದ್ಯಾವಾಳು ಧರ್ಮಶಾಸ್ತ್ರನಿ ಪರಕ್ ತುಮೆ ತೀರ್ಪ್ ಲೀಲ್ಯಾವಾಳನ ಬರೊಬರ್ಧಿ ವಾತ್‌ಬೋಲೊ ಅಜು ವಿಧೇಯ ಹುವೊ

13 ಶನಕತೊ ಗೋರ್‌ಕರಾಕೊಂತೆ ರ್ವವಾಳಾನ ನ್ಯಾವ್‌ನಿ ತೀರ್ಪ್‌ಮ ಗೋರ್ ವತಾಳ್‌ಶೆ ಕೊಯ್ತೆ. ಗೋರ್ ನ್ಯಾವ್‌ನಿ ತೀರ್ಪ್‌ನಾಸ್ ಜಿತಿಲಿಶೆ.

ವಿಶ್ವಾಸ್ ಅಜು ಕಾಮ್

14 ಮಾರ ಭೈಯೇ ಭೇನೆವೊ. ಏಕ್‌ಙ್ಲಣೊ ಮನ ವಿಶ್ವಾಸ್‌ಲ್ಲಾ ಕರಿ ಬೋಲಿನ್ ಕಾಮ್ ನಾರ್‌ಯೊತೊ ಶನೊ ಫಾಯಿದೊ? ಎಥ್ರಾನಿ ವಿಶ್ವಾಸ್ ಇನ ಬಙ್ಗಾಡ್‌ಶೆ ಕಿಶು?

15 ಏಕ್ ವೇಳ್ ತುಮಾರೊ ಏಕ್ ಭೈ ನತರ್ ಏಕ್ ಭೇನ್ನ ಫೇರಾನ ಲುಂಗ್ಡು ಅಜು ಯೋ ದನ್ನು ಖಾಣುಬಿ ನಾರ್‌ವಾಪರ್;

16 ತುಮಾರಮ ಎಕ್‌ಙ್ಲಣೊ ಇವ್ವುನ ಶರೀರ್‌ನ ಹೋಣುತೆ ಯೋ ನಾದೀನ್, “ಸಮಾಧಾನ್‌ಧಿ ಜಾವೊ, ಆಗ್ ಶೇಕಿಲೆವೊ, ಪೇಟ್‌ಭರಿಖಾವೊ” ಕರಿ ಬೋಲ್ಯೊತೊ ಶನೊ ಫಾಯಿದೊ?

17 ಇಮ್ಮಸ್ ಕಾಮ್‌ಕೊಂತೆ ವಿಶ್ವಾಸ್ ಜಾನ್ ಕೊಂತೆ ಹುಯಿರ್‌ವ್.

18 ಕತೋಬಿ ಥೋಡು ಙ್ಲಣು, “ತುನ ವಿಶ್ವಾಸ್ ಲ್ಲಾ, ಅಜು ಮಾರಮ ಕಾಮ್ ಲ್ಲಾ ತೂ ಕಾಮ್‌ಕೊಂತೆ ತಾರಿ ವಿಶ್ವಾಸ್‌ನ ಮನ ವತಾಳ್. ಮೇ ಮಾರ ಕಾಮ್‌ಧಿ ಮಾರ ವಿಶ್ವಾಸ್‌ನ ವತಾಳ್‌ಸ್!” ಕರಿ ಬೋಲೆಜಾಯ್.

19 ದೇವ್ ಎಕ್‌ಙ್ಲಣೊ ಕರಿ ಯೋ ವಿಶ್ವಾಸ್ ಕರಸ್, ಯೋ ಅಲ್ಫುಸ್. ಕತೋಬಿ ಶೈತಾನ್‌ಬಿ ಇಮ್ಮಸ್ ವಿಶ್ವಾಸ್ ಕರೀನ್ ಡರ್‌ಧಿ ಕಾಪಸ್.

20 ಅಲಾ ಬಿಣ್‌ಅಕ್ಲಿ! ಕಾಮ್‌ಕೊಂತೆ ವಿಶ್ವಾಸ್ ಫಾಯಿದೊಕೊಂತೆ ಕರಿ ತುನ ವತಾಳ್‌ನುಕಿ ಶು?

21 ಅಪ್ಪೊ ಗುರುಗುರುಬ್ಲೊ ಹುಯಿರೋತೆ ಅಬ್ರಹಾಮ್‌ನೊ ಛೀಯ್ಲೊ ಇಸಾಕನ ಬಲಿಪೀಠನ ಉಪ್ಪರ್ ಛಡಾವಾನಿ ವಖ್ತೆತೆ ನೀತಿನು ತೀರ್ಪ್‌ನ ಲೀಲಿದೋತೆ ವಿಶ್ವಾಸ್‌ನ ಕಾಮ್‌ಥೀಸ್ ಕಾಹೆಕಿ ಶು?

22 ಇನಿ ವಿಶ್ವಾಸ್ ಕಾಮ್‌ಜೋಡ್ಲೆ ಚಾಲ್ಯು ಅಜ್ಜು ಯೋ ಕಾಮ್‌ಥೀಸ್ ಇನಿ ವಿಶ್ವಾಸ್‌ನಿ ಖ್ವಿಯಾಲ್ ಚಾಲಿಗಿ ಕರಿ ದೇಖೆಸ್‌ನಿ?

23 ಇನಖ್ವಾಜೇಸ್ ಅಬ್ರಹಾಮ್‌ನೆ ದೇವ್ನ ವಿಶ್ವಾಸ್ ಕರೊಯ್ಲೊ ಅಜ್ಜು ಯೋ ವಿಶ್ವಾಸ್ ಇನಿ ಗಣ್ಣಿಮ ನೀತಿಕರಿ ಚೂಣ್ಣೆಗು ಕರಿ ಬೋಲನಿ ಧರ್ಮಶಾಸ್ತ್ರನಿ ವಾತ್ ಅಮ್ ಪೂರಹುಯು ಇನಖ್ವಾಜೆ ಅಬ್ರಹಾಮ್ ದೇವ್‌ನೊ ದೋಸ್ತಿಕರಿ ಬೋಲೈಲಿದೊ.

24 ಅಮ್ ಅದ್ಲಿ ಚಾಲ್‌ಥಿ, ಕಾಮ್‌ಥಿ ನೀತಿವಾಳೊಕರಿ ಖ್ವಣೇದ್‌ಮ ಆವಸ್ ಪಣ್ಣಿ ಖಲಿ ವಿಶ್ವಾಸ್‌ಥಿ ಕಾಹೆ ಕರಿ ದೇಖೊಸ್.

25 ಇಮ್ಮಿನ್ ಪರಕ್ ವ್ಯಬಿಚಾರಿಣಿ ರಾಹಾಬ ಜಿನು ಇನ ಘರ್‌ಮ ಹಾಲಿಹುಮಾಲಿಯೆವ್ವ ಮಳ್ಳೆಲೀನ್ ಅಲಕ್ ವಾಟ್‌ಥಿ ಇವ್ವುನ ಮೋಕ್ಲಿತೆ ಕಾಮ್‌ಥೀಸ್ ನೀತಿವಾಳಿ ಕರಿ ತೀರ್ಮಾನ್ ಲೀಲಿದಿ ಕೊಯ್ತಿಕಿಶು?

26 ಆತ್ಮಕೊಂತೆ ಶರೀರ್ ಮರಿಹುಯು ಹುಯಿರ್ದವಾನಿ ಪರಕ್ಮ್ ಕಾಮ್‌ಕೊಂತೆ ವಿಶ್ವಾಸ್‌ಬಿ ಮರ್ದುಹುಯುಸ್.

3

ಜೀಬ್

1 ಮಾರ ಬೈಯೇ ಭೇನೆವೊ. ಖ್ವಾರುಸ್ಲಣು ಶಿಕಾಡನ ಉತ್ಪಾಳಿ ನಕೊಕರೊ, ಶಿಕಾಡವಾಳ ಹುಯಿರ್ದಾತೆ ಅಪ್ಪೆ ಅಲಕ್ ಜಣೆಥೀಬಿ ಘಣಿ ನ್ಯಾಯತೀರ್ಪ್‌ನ ಶುಶತ್‌ಲುಶು.

2 ಶನಕತೊ ಕೈಯೇಕ್ ವಾತೇಮ ಅಪ್ಪೆ ಖ್ವಾರೊಸ್ ಗಲತ್‌ಹುಯಿ ಜೈಯೇಸ್. ಏಕ್‌ಜುಣೊ ವಾತ್‌ಗಲತ್ ನಾಹುಯೋತೊ ಯೊ ಇನ ಪೂರ ಶರೀರ್‌ಮ ಚಪ್ಪಣ್‌ಮ ರಾಖನ ಯೊ ಶಕತ್‌ವಾಳೊ ಹುಯಿರ್‌ಹೊಸ್.

3 ಹಂದೇಖೊ ಘೋಡೊಖ್ತಾರು ಅಪ್ಪಿ ಚಪ್ಪಣ್‌ಮ ಚಾಲನಿತರ ಯೋ ಅಖ್ಬಾನ ಮ್ಹೋಡಾನ ಲಗಾಮ್ ಫಾಲಿಯೆಸ್, ತದೆ ಇನ ಅಖ್ಬಯೇಕ್ ಶರೀರ್‌ನಾಸ್ ಅಪ್ಪುನ ಹೋಣುತೆ ಬಾಜು ಫರಾಯೆಚಾಯ್.

4 ಜಹಾಜ್‌ನ ಜಿನು ದೇಖೊ. ಯೋಖ್ತಾರು ಘಣು ಮೋಟು ರ್ಹಿಯುತೋಬಿ ತೋಫಾನ್ ವ್ಹಯಿರೆಥಿ ರುಕ್ ಬದ್ಲಿಜಾಸ್. ಕತೋಬಿ ಚಲಾವವಾಳೊ ಘಣು ನ್ಹಾನು ಚುಕ್ಕಾಣಿಥಿ ಯೋಖ್ತಾರಾನ ಯೋ ಜಾವ್ತುತೆ ಬಾಜು ಫರೈಲೇಸ್.

5 ಇಮ್ಮಸ್ ಜೀಬ್ ಜಿನುಬಿ ನ್ಹಾನು ಖ್ವಂದೊ ರ್ಹಿಯುತೋಬಿ ಮೋಟ ಕಾಮ್ನು ಬಡೈಮಾರಿನ್ ಕಂಡಿ ಚಡೈಲೇಸ್. ಆಗ್‌ನಿ ನ್ಹಾನಿ ಚಿನ್‌ಗಾರಿ ಮೋಟಿ ಝಾಡಿನಸ್ ಬಾಳಿನಾಖಸ್.

6 ಜೀಬ್‌ಬಿ, ಆಗ್‌ನಿ ಚಿನ್‌ಗಾರಿನಿತರಾಸ್. ಯೋ ಖರಾಬ್ ಜಗತ್‌ನು ಖ್ವಣೇದ್ ಹುಯಿನ್ ಅಪ್ಪ ಖ್ವಂದಾವ್‌ನ ಇಚ್ಚೆಮ ರ್ಹೀನ್ ಅಖ್ಬಾಏಕ್ ಶರೀರ್‌ನ ಮೈಲು ಕರಸ್. ಇನು ಯೋಸ್ ನರಕನಿ ಆಗ್ನಲಗಾಡಿಲಿನ್ ಯೋ ಅಖ್ಬಿ ಜಿಂದಗೀನಸ್ ಆಗ್‌ಲಗಾಡಸ್.

7 ಹರೇಕ್ ಜಾತ್ನು ಜೀನ್ ಜಿನಾವರ್‌ನಾಬಿ ವ್ಹವವಾಳು ಕೀಡ್‌ಕಮ್ಮನಾಬಿ, ಪಾಣಿನುಜಾನ್ವಾರ್‌ನಾಬಿ ಅದ್ಲಿ ಚಪ್ಪಣೆಮ ಲಾಯೆಚಾಯಿ ಅಜು ಲೈರಾಖ್ಯಾಸ್‌ಬಿ.

8 ಕತೋಬಿ ಜೀಬ್‌ನ ಕೆಹೊ ಅದಮ್‌ಜಮಾನೋಬಿ ಚಪ್ಪಣೆಮ ಲ್ಯಾವಕೊಯ್ಲಿ. ಯೋ ಚಪ್ಪಣ್‌ಮ ಆವಾಕೊಂತೆ ಕೇಡ್‌ಹುಯಿರ್ಲ್ಹಾಸ್ ಮರಣ್ಣ ಝಾರ್‌ಥಿ ಭರೈರ್ಲ್ಹಾಸ್.

9 ಯೋಸ್ ಜೀಬ್‌ಥಿ ಪ್ರಭು ಬಾಹುಯಿರೋತೆ ದೇವ್ನ ಧನ್ಯವಾದ್ ಕರಿಯೇಸ್, ಇನೀನಿಘೋಣಿನಿತರಸ್ ಉಬ್ಜಿಗಯುತೆ ಅದೈವ್‌ನ ಅಪ್ಪೆ ಶಾಪ್‌ದಿಯೇಸ್.

10 ಯೋಸ್ ಮ್ಹೋಡೇಥಿ ಧನ್ಯವಾದ್ ಅಜು ಗಾಳೆ ಭೇಬಿ ಆವಸ್. ಮಾರ ಭೈಯೇ ಭೇನೆವೊ, ಅಮ್ ನಾರ್‌ವೈವ್ವು.

11 ಎಕ್ಸಸ್ ಚೇಜ್‌ಭಾರೇಥಿ ಮಿಠ್ತು ಪಾಣಿ ಅಜು ಕಡುಪಾಣಿ ಭೇಬಿ ನಿಕಳಾಶೆಕಿ ಶು?

12 ಮಾರ ಭೈಯೇ ಭೇನೆವೊ, ಅಂಜೀರ್‌ನು ಝಾಡು ಓಲಿವ್

ಝಾಡಾನು ಪಂಡು ಮ್ಹೇಲ್‌ಶೇಕಿ ಶು? ದ್ರಾಕ್ಷಿನ ವೇಲಮ ಅಂಜೀರ್ ಮಳ್‌ಶೇಕಿ ಶು? ಇಮ್ಮಸ್ ಕೆಹೊ ಚೇರ್ಜ್‌ಭಾರೋಬಿ ಖಾರುಪಾಣಿನಾಬಿ ಮಿರು ಪಾಣಿನಾಬಿ ಕೋದಿಶೇನಿ.

ಉಪ್ಪರ್‌ಥಿ ಆಯುತೆ ಅಕ್ಕಲ್

13 ತುಮಾರಮ ಗ್ಯಾನೀಬಿ ಅಕ್ಕೀಬಿ ಕೋಣ್? ಅಥ್ರಾನವಾಳು ಅಲ್ಪಿ ಚಾಲ್‌ಥಿ ಸಮಾಧನ್ನಾ ಕಾಮ್‌ಥಿ ಜಿವಿನ್ ವತಾಳದೆ.

14 ಕತೋಬಿ ತುಮಾರ ದಿಲ್ಮ ಬಳಾಪೊ, ಕಡ್‌ವೈ ಅಜು ನಿಕ್‌ಳ್ಳೊಜಾನ್ ರಾಖಿನ್ ಅಕ್ಕಿಕರಿ ಖ್ವಾಚನ ವಿರೋದ್ ಝೂಟಿ ಬೋಲಿನ್ ಕಂಡಿಲ್ಲಡಾವೊ ನಕೊ.

15 ಯೋ ಉಪ್ಪರ್‌ಥು ಆಯಾತೆ ಗ್ಯಾನ್‌ಕಾಹೆ. ಯೋ ಜಮೀನ್‌ನಸಂಬಂದ್ ಪಡ್ಕುಹುಯು, ಲೋಕ್ಷಿಖ್ವಯೆಲ್ಲು ಅಜು ಭೂತ್‌ನ ಸಂಬಂದ್ ಪಡ್ಕುಹುಯು.

16 ಶನಕತೊ ಪೇಟೊ ಬಳಾಪೊಬಿ ವಹೇರ್‌ಬಿ ರ್ವಿಯಿತೆ ಬಾಜು ಕಲಾಪ್ಪಿಬಿ ಖ್ವಾರೀಸ್ ಥರಾನು ಖರಾಬ್ ಕಾಮ್‌ಬಿ ರ್ವೀಸ್.

17 ಕತೋಬಿ ದೇವ್‌ಥಿ ಆವಾನಿ ಗ್ಯಾನ್ ಪಹಿಲೆ ಪರಿಶುದ್ ಹುಯಿರ್ವಾಳು ಇನಪಾರ್ ಸಮಾಧಾನ್‌ವಾಳು, ಶೇದೇವ್ ಹುಯಿರ್ವಾಳು, ವಿಧೇಯ ರ್ವಾಳುಬಿ, ಗೋರ್‌ಥೀಬಿ ಅಜು ಅಲ್ಪಿಫಲ್‌ಥೀಬಿ ಭರೈರ್ವಾಳು, ಶುದ್ಧಮನ್‌ಥಿ ಬೋಲವಾಳು, ಖ್ವಾಳು ಬೋಲವಾಳುಕರಿ ಮುಷಿಥಿ ಮಾನಿಲ್ಯಾವನು ಹುಯಿರ್ವ್ವಸ್.

18 ಸಮಾಧಾನ್ ಕರಾವಾಳು ಸಮಾಧಾನ್‌ಕರಿ ಬೋಲಾನು ದಾಣಾನ ಗಾಡೀನ್ ನೀತಿಕರಿ ಬೋಲಾನು ಫಲ್ವ ವ್ವಾಡಸ್.

4

ಜಗತ್ತ್ ಜೋಡೆ ದೋಸ್ತಿ

1 ತುಮಾರಮ ಲಡೈ ಝಗ್‌ಡೊಖ್ವಾರು ಕಿಜ್ವಾಡು ಆವಸ್? ತುಮಾರ ದಿಲ್‌ದಿಮಾಕ್‌ಮ ಲಡಾತೆ ಲಾಲ್‌ಥಿಥೀಸ್ ಕಾಹೇಕಿಶು?

2 ತುಮೆ ಹರಖ್ಡಿಯತೋಬಿ ಲೀದಾಕೊಯ್ತೀಸ್ ಛಾ. ತುಮೆ ಖೂನಿ ಕರ್ಯತೋಬಿ. ಪೇಟ್ಟು ಬಳಾಪೊ ಕರ್ಯತೋಬಿ ಅಖ್ಡಕರ್ಯಹುಯನ ಕಮೈಲೆಯಿಕೊಯ್ತು; ತುಮೆ ಲಡೈ ಪಡೋಸ್, ಜಂಗ್ ಭಿಡೋಸ್. ಕತೋಬಿ ತುಮೆ ದೇವ್ ಬಿಂತಿ ಕರೆಲೇಯಿಕೊಂತೆ ಇನಟೀಕೆ ತುಮುನ ಶಾತ್ರಿ ಮಳಕೊಯ್ತು.

3 ಬಿಂತಿ ಕರಿಲಿದತೋಬಿ ಯೋ ತುಮುನ ಮಳಕೊಯ್ತು. ಶನಕತೊ ತುಮಾರಿ ಬಿಂತಿ ಖರಾಬ್ ಖೂಜ್‌ನು ಹುಯಿರೈಸ್. ಭೋಗ್ನಿ ಆಖ್ಡ್‌ನ ಚಲೈಲ್ಯಾವನು ತುಮಾರಿ ಶುಶತ್ ಹುಯಿರೈಸ್.

4 ವಿಶ್ವಾಸ್‌ಕೊಂತೆ ಅದ್ವಿವೊ, ಜಗತ್ತಿ ಜೋಡ್ಡ ದೋಸ್ತಿಕರಾನು ದೇವ್ ವಹೇರ್ ಕರಾನು ಕರಿ ತುಮುನ ಮಾಲುಮ್ ಕೊಯ್ತುಕಿ ಶು? ಇನಖ್ವಾಜೆ ಜಗತ್ತ್ ದೋಸ್ತಿಹುಯಿರೈವುಸ್ ಕರಿ ಬೋಲಿಲ್ಯಾವಾಳೊ ಇನುಯೋಸ್ ದೇವ್ ವಿರೋದಿ ಬಣೈಲೆಸ್.

5 ಆನಾಹುಯಿನ್ ಹಮಾರಮ ಜಿವ್‌ಕರಾಸ್ತೆ ಆತ್ಮನ “ಘಣಿ ಆಖ್ಡ್‌ಧಿ ಹೋಣುಕರಿ ಹರ್‌ಖ್ವುಕರುಸ್ ಕರಿ ಬೋಲಾನು ವಚನ್ನಿಖಾಲಿ ವಾತ್‌ಕರಿ ಲಾರ್ಹೊಸ್‌ಕಿ ಶು?

6 ಯೋ ಅಪ್ಪುನ ಘಣೇಧಿ ವಾಖ್ವಾನ್ ದೇಸ್. ಇನಖ್ವಾಜೇಧಿ, ದೇವ್ ಹಂಕಾರಿಯೆವ್‌ನ ವಹೇರ್‌ಕರಸ್. ಗೋರ್ ಗರಿಬ್‌ನತೋಬಿ ವಾರ್‌ಖೊದೇಸ್‌ಕರಿ ಪವಿತ್ರ ದಪ್ತರ್‌ಮ ಬೋಲಸ್.

7 ಅಮ್‌ರೈವಾಪರ್ ದೇವ್ ಅಧೀನ್‌ಹುಯಿನ್ ಶೈತಾನ್ನ್ ಡರಾವೊ ತದೆ ಯೋ ತುಮುನ ಮ್ಹೇಲಿನ್ ಮಿಲೈನ್ ಜಾಶೆ.

8 ದೇವ್ ಖನ್ನೆಆವೊ, ತದೆ ಯೋ ತುಮಾರ ಖನ್ನೆಆವಾಶೆ. ಪಾಪಿವೊ, ತುಮಾರ ಹಾತ್ತ್ ಧೊಯ್‌ಲೆವೊ ಬೇ ದಿಲ್‌ವಾಳವೊ ತುಮಾರ ದಿಲ್ ಪಾಕ್‌ಕರೈವೊ

9 ದುಖ್‌ಕರೊ ರದ್‌ನ್ಯಕರೊ ಆಂಝು ನಾಖೊ. ಹಾಖ್ವಾನ್ ಮ್ಹೇಲಿನ್ ಅಂದ್ರೋಖ್‌ಕರೊ; ಖ್ವಶಿನ ಮ್ಹೇಲಿನ್ ದಿಲ್ ದುಖೈಲ್ಯವಾಳ ಹುಯಿರೈವೊ.

10 ಪ್ರಭುನ ಖ್ವಾಷ್ಟೆ ತುಮುನ ಝುಕೈಲೆವೊ ತದೆ ಯೋ ತುಮುನ ಉಪ್ಪರ್ ಪಾಡಾಶೆ.

ವಿಶ್ವಾಸಿ ಅದ್ವಿತಿ ವಿರೋಧ್ ನ್ಯಾವ್ನಿ ತೀರ್ಪ್ಕರಾನಿ ಬಾರೇಮು
ಯೇತಾವ್ಣಿ

11 ಮಾರ ಭೈಯೇ ಭೇನೆವೊ ಏಕ್‌ನ ಏಕ್ ದುಖ್‌ನಕೊ ದೆವೊ.
ಕೋಣ್‌ತೋಬಿ ಇನ ಭೈನ ಚಿಂಫಾಯತೊ ನತರ್ ಇನಿ ಭೇಜ್ಜಣಾನಿ
ಬಾರೇಮು ತೀರ್ಪ್ಕರತ್ಯಾತೊ ಯೋ ಧರ್ಮಶಾಸ್ತ್ರನ ಚಿಂಫೈನ್
ಧರ್ಮಶಾಸ್ತ್ರನಿ ಬಾರೇಮು ತೀರ್ಪ್ಕರಾನಿತರ ಉಶೆ. ಕತೋಬಿ ತೂ
ಧರ್ಮಶಾಸ್ತ್ರನಿ ಬಾರೇಮು ತೀರ್ಪ್ಕ ಕರತ್ಯೊತೊ ತೂ ನ್ಯಾಯಾಧಿಪತಿ ಕರಿ
ಬೋಲೈಲಿಶ್ ಪಣ್ಣಿ ಇನ ಪಾಡಿಚಾಲವಾಳೊ ಕಾಹೆ.

12 ಧರ್ಮಶಾಸ್ತ್ರನ ದಿದೊಹುಯೊ ನ್ಯಾಯಾಧಿಪತಿ ದೇವ್ ಎಕ್ಕ್‌ಸ್
ಜ್ಜಣೊ; ಯೋಸ್ ಬಚ್ಚಾಡನಾಬಿ ನಾಶಕರನಾಬಿ ಶಕತ್‌ವಾಳೊ
ಹುಯಿರತ್ಯೊಸ್. ಅಮರ್ತ್ಯವಾಪರ್ ತಾರ ಭೇಡೆವಾಳಾನಿ ಬಾರೇಮು
ತೀರ್ಪ್ಕರವಾಳೊ ತೂ ಕೋಣ್?

ಬಡೈಮಾರವಾಳಾನಿ ವಿರೋಧ್ ಯೇತಾವ್ಣಿ

13 “ಆಜ್ಞೆನೊ ದನ್ ನತರ್ ಕಾಲ್ ಅಪ್ಪೆ ಅಥಾನ ಖ್ವಯೇರ್ನ್ ಜೈನ್
ಹಿಜ್ಜಾ ಏಕ್‌ವರಖ್ವರ್ತ್ವೊನ್ ಬೇಪಾರ್‌ಕರೀನ್ ನಪ್ಪೊ ಕಮೈಲಿಯೇಸ್”
ಕರಿ ಬೋಲವಾಳ ಖ್ವಮ್‌ಜೊ.

14 ಕಾಲ್‌ಶಾತ್ ಉಶೇಕಿ ತುಮೂನ ಮಾಲುಮ್ ಕೊಯ್ಚಿ
ತುಮಾರು ಜಿಂದ್‌ಗಿ ಕಿಮ್ಮಿ? ಯೋ ಥೋಡಿಘಡಿ ದೆಖೈನ್ ಇನಪಾರ್
ದೆಖಾವಕೊಂತೆ ಧುವರ್‌ನಿತರ ತುಮೆ ಛಾ.

15 ಇನಖ್ವಾಜಿ ತುಮೆ ಅಥಾನಿ ವಾತ್ಸ ಮ್ಹೆಂದಿನ್ “ಪ್ರಭುನಿ ಖ್ವಾಜ್
ಉಷೇತೊ ಅಪ್ಪೆ ಬಚಿರತ್ವಿಶು ಅಜ್ಜು ಆ ಕಾಮರ್ತ್ವೊವೊ ಯೋ
ಕಾಮರ್ತ್ವೊವೊ ಕರ್ತು” ಕರಿ ಬೋಲಾಶು ಕರಿ ತುಮೆ ಬೋಲಿಲೇವ್ಣಿ.

16 ಕತೋಬಿ ತುಮೆ ತುಮಾರಿ ಅಹಂಕಾರ್‌ಧಿ ತುಮಾರಿ ಬಾರೇಮು
ಬಡೈಮಾರಿಲೇವೋಸ್. ಎಥಾನಿ ಖ್ವರಾವ್ಣಿ ದೇವ್‌ಖ್ವಾಮ್ಣಿ ಗಲ್ತೀಸ್.

17 ಅಮರ್ತ್ಯವಾಪರ್ ಅಲ್ಟಾನ ಕರ್ನುಕರಿ ಮಾಲುಮ್ ರತ್ವೊನ್‌ಬಿ
ಕೋ ಕರಾಂತೆ ಯೊ ಪಾಪ್ ಕರಾವಾಳೊ ಹುಯಿರತ್ಯೊಸ್.

5

ಶೌಕಾರ್‌ನ ರೈತಾಪ್ಪಿ

1 ಶೌಕಾರ್‌ವಾಳೊ, ತುಮೂನ ಆವ್‌ಶೇತೆ ಖ್ವತಾಪ್ಪಿನಖ್ವಾಜೆ ಆಂಝುನಾಖೊ, ರದನ್ ಕರೊ.

2 ತುಮಾರಿ ಧನ್ ದೌಲತ್ ನಾಶ್‌ಹುಯಿಗು. ತುಮಾರ ಲುಂಗ್ಡಾನ ಕಂದ್ ಧರಿಲಿದು.

3 ತುಮಾರು ಖ್ವೊನ್ನು ರೂಪು ಕಿಲಪ್ ಧರಿನ್ ಮಾಟಿನ ಬರೋಬರ್ ಹುಯಿರಲ್ಲ್ಹಸ್. ಯೋ ಖ್ವಾರಾನು ಕಿಲಪ್ ತುಮೂನ ವಿರೋದ್. ಸಾಕ್ಷಿ ಹುಯಿರಲ್ಲ್ಹಸ್ ಆಗ್‌ನಿತರ ತುಮಾರಿ ಬೋಟಿನ ಭುಂಜಿನಾಕ್‌ಶೆ. ಖ್ವರ್ತಿನ ದನ್ತ್ ಆಯಿಗುತೋಬಿ ದೌಲತ್ ಜ್ಞಮಾಕರೀನ್ ತುಮೆ ಮ್ಹೇಲಿರಾಖ್ವಸ್.

4 ದೇಖೊ ತುಮಾರ ಖೇತರ್‌ಮಾನು ಅನಾಜ್ ವ್ಹಾಡ್ವಹುಯಾನಿ ಕೂಲಿ ದಿದಾಕೊಂತೆ ತುಮೆ ರಗೈಲಿದಾ. ಯೋ ಕೂಲಿವಾಳನಿ ಕೂಫಾಟಿ ಅಜ್ಜು ವ್ಹಾಡವಾಳಾನಿ ಚಿಕ್ರಾಣ್ ಆ ಅಖ್ವಾನ ಕರಾವಾಳೊ ಸೊರ್ಗನು ಡಂಡ್ಲೊ ಸರ್ವಶಕ್ತ ದೇವ್ ಪ್ರಭುನ ಕಾನ್ಮಟಿಹುಕೊ ಪಡಿರಲ್ಲ್ಹಸ್,

5 ಧರ್ತಿಪರ್ ತುಮೆ ಸುಕ್‌ಭೋಗ್‌ವಾಳ ಹುಯಿನ್ ತುಮಾರಿ ಆಖ್ವಾನ್ ಪೂರಕರೈಲ್ಯವಾಳ ಹುಯಿನ್ ಜಿವಿರಲ್ಲ್ಹಸ್. ಬಲಿನ ದನ್ನ್ ಖ್ವಾಜೆಕಿಶುಕಿ ಕರಿ ತುಮಾರು ದಿಲ್ವ ಫುಲೈಲಿದಾತೆ.

6 ತುಮೆ ನೀತಿವಾಳಾನ ಗಾಳೆದೀನ್ ಖೂನ್‌ಕರಿನಾಖ್ವ, ಯೋತೋಬಿ ತುಮೂನ ವಿರೋದ್ ಕರುಕರಕೊಯ್ವಿ.

ಪ್ರಾರ್ಥನೆ ಅಜ್ಜು ಖ್ವಮಾಳಾನು

7 ಭೇನೆ ಭೈಯೇವೊ, ಪ್ರಭು ಆವಾಲಗು ಖ್ವಮಾಳಿರಲ್ಲ್ಹವೊ. ಪಿಕಾವಾಳಾನ ದೇಖೊ, ಯೋ ಜ್ಞಮೀನ್ನು ಮೋಲ್ವ ಜ್ಞಾವಾನು ಫಲ್ವಖ್ವಾಜೆ ಟಿವೈರಲ್ಲ್ಹೀನ್ ಮುಂಗಾರಲ್ಲ್ಹೊ. ಹಿಂಗಾರಲ್ಲ್ಹೊ ಪಾಣಿಅಖ್ವು ಆವಾಲಗು ಖ್ವಮಾಳಿನ್ ರಲ್ಲ್ಹೀಸ್.

8 ತುಮೇಬಿ ಖ್ವಮಾಳಿರಲ್ಲ್ಹೊ, ತುಮಾರ ದಿಲ್ವ ಘಟ್‌ಕರಿಲೆವೊ. ಶನಕತೊ ಪ್ರಭು ಆವಾನದನ್ ಖನ್ನೆ ಹುಯಿಗು.

9 ಬೈಯೇ ಭೇನೆವೊ, ತುಮೆ ಏಕ್‌ನ ಉಪ್ಪರ್ ಏಕ್ ಗಲತ್ ನಕೊಬೋಲೊ; ಅನೇಥಿ ನ್ಯಾವ್‌ನಿ ತೀರ್ಪ್‌ಮ ಪಡಿಚ್ಚಾಶು. ಹಂದೇಖೊ ನ್ಯಾವ್‌ನೊ ಅದಿಪತಿ ಬಾಕಲ್‌ನ ಖ್ವಾಮ್ಪ್ಲೆಸ್ ಭೇಯೊಸ್.

10 ಬೈಯೇ ಭೇನೆವೊ, ವದೇಖ್ವಾನ್ ಖ್ವಮಾಳಿಲ್ಯಾವಾನಿ ಬಾರೇಮ ಪ್ರಭುನ ನಾಮ್‌ಥಿ ವಾತ್ ಬೋಲ್ಯಾತೆ ಪ್ರವಾದಿ ಖ್ವಾರನಾಸ್ ಯಾದ್ ಕರಿಲೆವೊ.

11 ಹಂದೇಖೊ, ಖ್ವಮಾಳಿಲ್ಯಾವಾಳನ ಧನ್ಯಕರಿ ಅಪ್ಲೆ ಗಣ್ತಿ ಕರಿಯೇಸ್ ಕೊಯ್ನಿಕಿಶು, ತುಮೆ ಯೋಬಮ ಧೂತೆ ಖ್ವಮಾಳಿಲ್ಯಾವಾನಿ ಬಾರೇಮ ಖ್ವಮ್‌ಜೊ, ಪ್ರಭು ಇನ ಖ್ವರ್ತಿಮ ಕರ್ಯೊತೆ ದೇಖೊ. ಪ್ರಭು ಗೋರ್‌ವಾಳೋಬಿ ಅಜ್ಜು ದಯಾಕರವಾಳೋಬಿ ಹುಯಿರ್‌ಹೊಸ್ ಕರಿ ಖ್ವಮ್‌ಜಿರಾಖ್ಯಾಸ್.

12 ಮುಖ್ಯಧಿ ಮಾರೆ ಬೈಯೇ ಭೇನೆವೊ, ಆಣ್ ಕರೋಸ್ ನಕೊ ಆಬ್‌ಪರ್ ರ್ಲವೊ. ಧರ್ತಿಪರ್ ರ್ಲವೊ. ಬಿಜ್ ಶನಾಪರ್‌ಬಿ ರ್ಲವೊ ಆಣ್ ಕರೋನಕೊ ಒಹೊ ಕರಿ ಬೋಲಾನು ರ್ಲಯಾತೊ ಒಹೊಕರಿ ಬೋಲೊ; ಕೊಯ್ನಿಕರಿ ಬೋಲಾನು ರ್ಲಯಾತೊ ಕೊಯ್ನಿಕರಿ ಬೋಲೊ; ಅಮ್‌ರ್ಲಯಾತೊ ತುಮೆ ನ್ಯಾವ್‌ನಿ ಖ್ವಣೇದ್ ಉಶುಕೊಯ್ನಿ.

13 ತುಮಾರಮ ಕೋಣ್‌ತೋಬಿ ಖ್ವತಾವಾಳ ಲಾಕಿ? ಯೋ ದೇವ್ ವಿಶ್ವಾಸ್‌ಥಿ ಪ್ರಾರ್ಥನೆ ಕರಾದೆ. ತುಮಾರಮ ಕೋಣ್‌ತೋಬಿ ಖ್ವಶಿ ಕರಾವಾಳೊ ಲಾಕಿ? ಇವ್ಲೆ ದೇವ್ ಸ್ತುತಿನು ಗೀದ್ ಬೋಲಾದೆ.

14 ತುಮಾರಮ ಕೋಣ್‌ತೋಬಿ ಜಾನ್ನ್ ಅಱ್ಱು ನಾ ರ್ಲವಾಳು ಲಾಕಿ? ಯೋ ಸಬೇನು ಶಾಣವ್ ಬುಲೈನ್ ಪ್ರಾರ್ಥನೆ ಕರಾನ ಬಿಂತಿ ಕರಾದೆ. ಇವ್ಲೆ ಪ್ರಭುನ ನಾಮ್‌ಥಿ ಇನ ತೇಲ್ ಲಗಾಡಿನ್ ಇನದೇಶೆ ದೇವ್ ಪ್ರಾರ್ಥನೆ ಕರಾದೆ.

15 ವಿಶ್ವಾಸ್‌ಥಿ ಕರಾತೆ ಪ್ರಾರ್ಥನೆ ರೋಗ್‌ವಾಳನ ಗುಣ್‌ಕರಸ್. ಅಜ್ಜು ಪ್ರಭು ಇನ ಉತಾಡಸ್, ಯೋ ಪಾಪ್ ಕರಿರಾಖವಾಳೊ ಉಷೇತೊ, ದೇವ್ ಯೋ ಪಾಪ್ ಅಖ್ವಾನ ಕ್ಷಮಾಕರ್‌ಶೆ.

16 ಅಮೆರ್ತ್ವಾಪರ್ ತುಮೆ ಗುಣ್ ಹೋಣುಕತೊ ತುಮಾರಿ ಪಾಪ್ಪಅಖ್ವಾನ ಏಕ್‌ಥಿಏಕ್ ಹರ್‌ಕೆ ಕರಿನ್ ಏಕ್ ಭಣಾನಖ್ವಾಜೆ ಏಕ್‌ಭಣು ಪ್ರಾರ್ಥನೆಕರೊ. ನೀತಿವಂತಾನು ಪ್ರಾರ್ಥನೆ ಘಣು ಶಕತ್ನು ಹುಯಿರ್ಲ್ಯಸ್.

17 ಎಲೀಯ ಅಪ್ಪಿ ಧರಾನಿ ಖ್ವಿಯಾಲ್‌ವಾಳೊ ಹುಯಿರ್ಲ್ವೊಡೊ. ಯೋ ಪಾಣಿ ನಾ ವರಖ್ವೊಣುಕರಿ ಭಕ್ತಿಧಿ ಪ್ರಾರ್ಥನೆ ಕರಾದಿನ್ ತೀನ್ ವರಖ್ವೊಣೋ ಮಹಿನಲಗೂಬಿ ಧರ್ತಿಪರ್ ಪಾಣಿ ವರ್‌ಶ್ಯೊಕೊಯ್ನಿ

18 ಪಾಲ್ಟೊ ಯೊ ಪ್ರಾರ್ಥನೆ ಕರಾದಿನ್ ಆಕಾಶ್ ಪಾಣಿವರ್‌ಖ್ವಾಯ್ತು. ಜಮೀನ್ ಫಲೊದಿದು.

19 ಮಾರ ಭೈಯೇಭೇನೆವೊ, ತುಮಾರಮ ಕೋಣ್‌ತೋಬಿ ಖ್ವಾಜೆ ಮಾರಗ್‌ನ ಮ್ಹೊದಿನ್ ಗಲ್ತಿಧಿ ಚಾಲುಕರ್ತು ಉಷೇತೊ ಬಿಜೇಕ್ ಭಣು ಇನ ಅಲ್ಫಮಾರಗ್‌ಪರ್ ಲಾಯುತೊ;

20 ಏಕ್ ಪಾಪಿನ ಗಲತ್ ಮಾರಗ್‌ಪರ್‌ಥು ಛುಕ್ಯೆನ್, ಬದ್‌ಲೈನ್ ಇನ ಆತ್ಮಾನ ಮರಣ್‌ಥು ಬಚಾಡೀನ್ ಘಣ ಪಾಪ್ಪ ಯೋ ಕ್ಷಮಾ ದ್ಯವಾಡವಾಳೊಕರಿ ಮಾಲುಮ್ ಕರಿಲ್ಯಾವಾದೆ.

ದೇವ್ವಿ ಖಾಜಿ ವಚನ್

The New Testament in the Vaagri Booli language of India: ದೇವ್ವಿ ಖಾಜಿ ವಚನ್ (Bible)

copyright © 2023 The Word for the World International

Language: (Vaagri Booli)

Contributor: The Word for the World International

ದೇವ್ವಿ ಖಾಜಿ ವಚನ್ ವಿ ಒಪ್ಪಂದಾನ, 2023

The New Testament in Waghri Vathe Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-07-09

PDF generated using Haiola and XeLaTeX on 9 Jul 2025 from source files dated 9 Jul 2025

c0e4b622-a4d7-5e71-865e-40f2bf35bd06